

HEADLINES (EVENING)

1. Home Minister Pu K.Sapdanga'n Mizoram Police Department-ah post ruak 4,666 a awm mek a, hnathawktu lak thar tumna a awm thu a sawi.
2. Lunglei Ni chu vawiin khan Lunglei khawpui-ah hlim taka lawm a ni.
3. Vawiin khan Central Training Institute, Sesawng-ah 11th Batch, Excise & Narcotics, Basic Training zote pualin 'Passing Out Parade' hun hman a ni.
4. US leh Israel tangdunin Iran an beih chhunzawm zel.

<><><>

ASSEMBLY-VACANT POSTS

Home Minister Pu K.Sapdanga'n Mizoram Police Department-ah post ruak 4,666 a awm mek a, hnathawktu lak thar tumna a awm thu a sawi.

Assembly budget session kal meka ziaka zawhna chhangin Home Minister chuan Home Department, Mizoram Police hnuai Rank /grade/ unit hrang hrangah sanction post sing 1, sang 2,228 a awm tih sawiin, chung zinga post 7562 chu luah niin, tun dinhmunah post ruak 4,666 a awm mek a, post lak thar tumna a awm tih a tarlang a ni. Pu K Sapdanga chuan, Assembly budget session kal mekah Police an indaih lo hle tih sawiin, tun dinhmunah Mizoram police hnuai post ruak battalion 4 daih a awm mek a, hetihlai hian police post ruak te hnawh khat turin sorkar sumin a daih chiah lo tih House a lo hrilh tawh a ni.

<><><>

DRUG HAUL

Champhai district Police-te chuan methamphetamine kg 6 thelh leh heroin gram 68 an man.

Champhai district Police hotute hnen atanga Akashvani News Aizawl thu dawn danin he'ng ruihhlo tawlhtu a puh Myanmar mi 2 leh Mizoram mi 1 an man a. An methamphetamine man kg 5 leh gram 935 hi cheng vaibelchhe 4 leh nuai 74 chuang hu a chhut a ni a, heroin hi cheng nuai 13 chuang hu a chhut a ni bawk. Pathianni chawhnu herah khan Police-te chuan car pakhat Vaphai khaw mi Lalhriathlua (26) khalh chu an rinhlelh avangin an zui ru a. Chhungte khaw hnuai-ah nangchingin car an dap lai mekin scooter pakhat chu anmahni lam pana rawn tlanin Police te an hmuh rualin a tlanche nghal a, Police te hian an umzui nghal a, Scooter khalhtu leh a hnunga chuang te chuan Scooter chu an tlanchiatsan a. Pu Alan Hmangaihanga DySP (HQ) leh a hote'n thu an zawhfiahna atangin hemite pahnih hi tunge an nih hre chhuakin Khankawn check gate leh Zotlang inkarah an man ta a.

An ruihhlo dahna an dawp chhuah hnu-ah la chhuakin an bag hring thuhruk chu dapin ruihhlo hi an hmuchhuak ta a. A hnu a an mimante hi Kaplianmanga (45) leh Lalnunzira (21) te hi Tlangkawi khua, Chin state Myanmar amite an ni a. Champhai Police Station-ah Narcotic Drugs & Psychotropic Substances Act, 1985 section 22(c)/21(b)/29 leh Immigration and Foreigners Act, 2025 section 21 hmangin thubuai ziah luh a ni a. He thil hi chhui zui zel a ni.

<><><>

LUNGLEI DAY

Lunglei Ni chu vawiin khan Lunglei khawpui-ah hlim taka lawm a ni.

Kum 1889 March ni 4-a Colonel Tregear-a'n "Fort Lungleh" a sak tan ni hriat reng nan leh Lunglei khawpuia cheng, thang leh thar zelte'n Lunglei khawpui hmangaihna thinlung an put thar zel theih nana Lunglei puala ni bik ruahman, "Lunglei Ni" hi Lunglei Municipal Council (LMC) huaihawtin Lungleia C. Thumluaia Mualah a tum khat nan hlawhtling taka hman a ni a. Khuallian LMC Chairman Pu Lalzuithanga chuan Lunglei chu Municipal Council nei, khawpui lian a nih tawh avangin sawrkara inngat pumhlum ngawt lo va, mahni thawh rimna hmanga khawpui enkawl a, hmasawnpui tura mawhphurhna pek a nih thu sawiin, chu mawhphurhna chu hlen tumin LMC chuan theih tawp a chhuah a ti a, Lunglei mipuite chu Lunglei Ni hi mahni thawh chhuah hmang ngeia intodelh dan tur ngaihtuahna ni atan hmang turin a chah.

LMC chairman chuan Lunglei chuan State University leh kalkawng chungchangah te, kawng tam takah Mizoram sawrkar duhsakna a dawng nasa tih sawiin, Lunglei thalai rualte chu ruihhlo leh nawmchenna danga inhmang ral mai hman an ni lo tih hria a, zirna, ei zawna leh hmasawna kawng hrang hrangah tan la turin a chah a ni.

Lunglei Ni hmannaah hian tualchhung kutchhuak thuam leh bungrua bakah ei tur zawrhna stall hrang hrang hawn a ni a, naupang intihlimna hmun (Kids Zone) buatsaih a ni bawk a. Lunglei Photographers' Association (LPA) buatsaih "Photo Gallery"- ah thlalak mawi tak tak pho chhuah niin, Souvenir Committee buatsaih "Lunglei Ni Souvenir Magazine" leh hriatrengna thil — kawr, lukhum, no, fridge magnet leh a dangte lei theiha chhawp chhuah a ni bawk. Lunglei Ni pual hian intihsiakna hrang hrang Thu Chheh (Essay Writing), Lem Ziak (Painting), Au Hla (Slogan), Thlalak (Photography) leh Lem Che (Reels Making) buatsaih a nih bakah, Talk Show leh Seminar te buatsaih a ni bawk a ni.

<><><>

ASSEMBLY-GINGER

Mizoram sorkarin kum 2024 atanga kumin 2026 January chhungin sawhthing leina atan cheng vbc 141, nuai 16, sing 8, sang 4 leh 410 a seng a, Sawhthing hralhna atangin cheng vbc 12, nuai 78, sang 7 leh 290 a hmu let.

Assembly budget session kal mekah Tuirial bialtu Pu K.Laldawngliana zawhna ziaka chhangin Agriculture Minister Pu P.C. Vanlalruata chuan kum 2024 atanga kumin 2026 January chhunga thlai thar lei tura thlan bik sorkarin a lei dan tarlangin, Sawhthing quintal nuai 3, sing 4, leh 98 lei nan cheng vbc 141, nuai 16, sing 8, sang 4 leh 410 a seng a, Sawhthing hralhna atang hian cheng vbc 12, nuai 78, sang 7 leh 290 hmuh let a nih thu a tarlang a. Hei bakah hian Hmunphiah ro quintal 2,497 chu ZOHANDCO kaltlangin a lei a, Buhhum quintal 4,156 leh kg 8 chu cheng nuai 124, sing 6, sang 9 leh 860-in lei a nih tawh thu a tarlang a ni.

<><><>

ASSEMBLY-E-OFFICE

DP&AR Minister Pu K.Sapdanga'n tun dinhmunah office panga-ah e-Office kal pui a ni tawh a, langtlang Sorkar siamna atan a tangkai hle a ti.

Assembly Session kal meka ziaka zawhna chhangin DP&AR Minister chuan e-office chu Paper hman lovin file leh document-te kaltir a nih avangin Paper mana insen teuh teuh a ngaih loh bakah, a felfai a, file chhui zung zung a tih awlsam bakah Document-te awlsam taka zawn chhuah mai a ti-awlsam a ti a. Minister chuan e-Office chhungah him taka document-te dah that an nih avangin kangmei leh chhياتna dang lakah pawh a him hle tih sawiin, e-Office chhungah file kal dante a lang chiangin, lang tlang Sorkar siamna lamah a tangkai hle a ti a. Hna thawhna-ah file kal kualtir zung zung a awlsam avangin a tangkai hle a ti a, e-Office atang hian file zawn chhuah, a hmanhmawh thlak dan azira kal kualtir, awlsam taka a kawltu leh a kalna chin zawn chhuahte a awlsam a, hna thawh a ti awlsamin, hlawk zawkin hna a thawh theih phah a ti a. e-Office-a file-te chu Officer credentials neite chauhin an en theih avangin a him bawk tih a tarlang a ni.

Minister chuan tun dinhmuna e-office kalpuina office 5 (panga) te bakah Aizawl District, Champhai District, Khawzawl District, DC, Kolasib District, Lawngtlai District leh Saitual District a office 23 ah te e-office kalpui leh tumin hma an la leh mek tih a tarlang bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

PASSING OUT

Vawiin khan Central Training Institute, Sesawng-ah 11th Batch, Excise & Narcotics, Basic Training zote pualin 'Passing Out Parade' hun hman a ni.

He hun hi Excise & Narcotics Minister Pu Lalngthinglova Hmar chuan khuallian niin hun a hmanpui a, Adviser to Chief Minister Pu Lalmuanpuia Punte-in khualzahawm niin a telpui bawk. Training hi nikum September ni 1 atang khan tan a ni a, training chhuakte hi an vaiin mi 22 niin Sub-Inspector 12 leh Constable 10 an ni. Minister chuan Excise & Narcotics Department chu Chief Minister thlawpna hnuaiiah department hmasawn berte zinga mi a nih thu a sawi a. Department-ah thawktu indaih lohna a nasat thin thu sawiin tun kum hnih kalta chhungin thawktu, mi thar 28 direct recruitment-a lak fel an nih tawh thu te, mi 41 lak belh lehna tur pawh buaipui mek a nih thu leh post thar pawh 16 siam a nih thu a sawi bawk.

Heng bakah hian District thar 3-ah Excise Station hawn thar a nih thu sawiin, Inspector awpna hnuaiiah awm thin kha Lawngtlai nen Assistant Commissioner awpna hnuaiiah an awm tawh tur thu a sawi a. Tunah Sairang leh Bairabi-ah Excise Station thar hawn phalna an nei leh tawh thu a sawi bawk. Minister chuan Excise & Narcotics Department-in tun hnaiah lirthei thar 21 an dawn thu sawi bawkin, ruihhlo dona tura sawrkar inbuatsaihna vek a nih thu a sawi a. Training chhuak tharte pawh theihtawp chhuah tura chahin 'Indo kan ni a, kan do lamah kan tan a thiang lo', tiin tumah ruihhloa inhnamhnawih lo turin a chah bawk.

<><><>

WEST ASIA CONFLICT

US leh Israel-in Iran an bei chhunzawm zel a, Israel sipai-ten Tehran khawpuia Basij leh Iran sorkar hmun pawimawh, internal security command centre-te, wawi engemawzat an kap a, Lebanon ram khawpui, Beirut-a Hezbollah hmun pawimawhte an bei tan bawk.

Hetih lai hian US Central Command commander, Admiral Brad Cooper-a chuan Iran laka Operation Epic Fury thlak chu US-in a chawlh san dawn lo tih sawiin Iran chu a chak lo tial tial tawh, a ti a, beihpui thlak tan atanga darkar 100 pawh tling lovah US chuan a bitum hmun sang 2 thelh a kap chhia tih sawiin boruaka Iran invenhimna hmanruate nasa tihchhiat anih bakah Iran ballistic missile, launcher leh drone za tel kah chhiat a ni tawh, a ti bawk.

US-a inkhuar, Human Rights Activists News Agency (HRANA) chuan, Feb ni 28 atang khan Iran-ah civil mi 1,097 an thi tawh niin a sawi.

Hetih lai vek hian Iran leh US leh Israel tangdun inbeihna kara beihna tawk ve, Cyprus-ah United Kingdom leh France-ten indo lawngliante leh air defence hmanrua pawimawhte an tir lut a, UK Prime Minister, Keir Starmer-a chuan Cyprus leh he rama British sipai awmte himna chu UK-in a ngaipawimawh hle a ni, a ti.

<><><>